

Biswajit Daimary Assam Assembly Speaker asütsü



GUWAHATI: BJP MLA Biswajit Daimary-i Bodhbarnü Assam assembly nung Speaker atema nomination file asüba noksa nung angur.

Guwahati, Monupii/May 20 (Agencies): Paneri constituency nungi MLA Biswajit Daimary, Assam Legislative Assembly Speaker asütsü renema lir.

BJP lenir Biswajit Daimary, shibai tawa tembangba Assam Assembly elections nung Paneri menden koka liasü, pa ya taoba mapang Rajya Sabha MP ka liasü.

Taruba Assam Assembly Speaker asütsü asoshi Biswajit

Daimary shimba osang ya Assam BJP tir Ranjit Kumar Dass-i sangdonga liasü.

Assam Assembly Speaker mapa atema asadanga nisungtem rongnung Biswajit Daimary tenüng ya temaba jenjang nung liasü.

2020 küm November ita Bodoland Territorial Council elections magi tsünga Daimary-i BPF toktsür Bharatiya Janata Party nung oa aden.

Kasa mapang nung Bokajan constituency nungi MLA Dr Nomal Momin, taruba Assam Legislative Assembly Deputy Speaker asütsü asoshi shimogo.

"BJP state committee senden nung taoba MP aser MLA tejen Biswajit Daimary na taruba Assam Legislative Assembly speaker asütsü asoshi nominate süogo," ta Assam BJP-i sangdong ka ajanga metetdaksü.

Arunachal nung nisung 337 dak COVID-19 tashidak putet

Itanagar, Monupii/May 20 (Agencies): Arunachal Pradesh nung nisung 337 dak COVID-19 tashidak putetba sülen state nung tang tashi nung nisung 22,799 dak iba tashidak putetogo, ta health department ketdangsür kati Brehostibarnü metetdaksü.

Kasa mapang nung state nung COVID-19 tashidak agi Bodhbarnü nisng ka asüba sülen tashidak agi asür 89 jungogo, ta ketdangsür-isa ashi.

Doimukh nungi arishi küm 58 tain tebur ka tangola mesapoini par kidang süogo. Pa hypertension aser diabetes mellitus agi kongshir liasü, ta State Surveillance Officer Dr Lobsang Jampa-i ashi.

Arunachal Pradesh nung tang COVID-19 tashidak agi shiranger 2,585 lir.

Brehostibarnü sangdongba nisungtem rongnung Capital Complex tesem nungi 75, Lower Subansiri nungi 39, Tawang 37, Kamle 28, Upper Subansiri 27,

Lohit 22, Namsai 21, West Kameng 19, Changlang 15 aser Lower Dibang Valley nungi 14 densema lir.

Maneni East Siang nungia nisung ti, East Kameng nungi trok, Upper Siang, Tirap, Pakke Kessang aser Papumpare nungi pongungu, West Siang nungi asem, Dibang Valley nungi ana aser Kurung Kumey district nungi ka densema lir, ta SSO-i ashi.

Brehostibarnü tashidak putetertem rongnung sample 299 rapid antigen test ajanga, RT-PCR ajanga 19 aser TrueNat ajanga 19 puteta liasü, ta Jampa-i ashiba den nisung 154 dak COVID-19 tashidak keta aliba temaitsü sayur, ta shisem.

Bodhbarnü nisung 148 anepogo aser tang tashi nung ajak senteper nisung 20,125 anepogo.

Arunachal nung recovery rate 88.27 lir aser iba den active percentage 11.34 aser positivity

rate 7.47 per cent nung lir ta ketdangsüri ashi.

Capital Complex Region nung Itanagar, Naharlagun, Nirjuli aser Banderdewa densema lir aser iba tesem nung nisung 609 tashidak menar temang anepaludar. Capital Complex Region sülen Lower Subansiri (223), Changlang (200), Lohit (198), Namsai (188), Tawang (174), Lower Dibang Valley (160), West Kameng (125), East Siang (104) aser Upper Subansiri (103) nung tashidak menar temang anepalua alirtem timba lir.

State nung tang tashi nung sample 5,16,372 tendangogo, kong Bodhbarnü sample 4,509 tendangba densema lir, ta SSO-i ashi.

State Immunisation Officer Dr Dimong Padung-i ashiba agi, tang tashi nung nisung 3,20,635 nem vaccine agütsüogo, kong nisung 2,38,795 mezüngbuba dose agiogo aser nisung 81,840 tanabuba dose dena agiogo.

Assam: Darrang police-i temesepba mozü ayoker ka apu



Guwahati, Monupii/May 20 (Agencies): Darrang district, Superintendent of Police mapa belenzükba sülen ghonda ishika dang lir Sushanta Biswa Sarma-i, ozüng alema inyaksangshibatem aser talisa temesepba mozü dak sendakba nung jenjang tapet agitsü atema

pa tebilemba aliba jang jangja sayuogo.

Darrang SP Sushanta Biswa Sarma-i, district kübok tesem balala nung meita aoba sentong ayongzükba agi. Bodhbarn aonung DSP (HQ), Mamoni Hazarika-i anir police team kati Dhula Police Station kübok

Ondolajhar yimsüing meita aoba mapang temesepba mozü ayoker Samad Ali (32) puogo.

Pa ket nungi heroin vial tenet nung inoka aliba ngutetogo aser iba den ano ganja dena yua aliba ngutetogo.

Northeast Now den sensaksemba mapang tawa shimba Superintendent Sushanta Biswa Sarma-i, iba amala mesükba inyakyim ta tarutsü nunga benoka inyaksü, ta ashi.

"Iba ya tetenzükker dang ta ni osang tesashi ka yokner. Iba amala mesükba inyakyim ya tarutsü nunga benoka inyaksü," ta Darrang SP, Sushanta Biswa Sarma-i ashi.

Tripura sorkari Class 1 nungi 4, 6 & 7 kaketshirtem pass sütsütsü

Agartala, Monupii/May 20 (Agencies): State nung Covid-19 wara pokteter aliba ajanga tensa mejangjai kümogo, anungji iba dak ajemdaker Tripura sorkari Classes 1 nungi 4 aser Classes 6 aser 7 nung zünga aliba kaketshirtem takümba tatidang magi pass sütsütsü telemtetba agiogo.

Kaketshirtem tatidang magi pass sütsütsü telemtetba agiba den school tem nung summer break May 25 nungi June 7 tashi atsülangtsüogo.

Education Minister Ratan Lal Nath-i, "Class I, II, III, IV, VI & VII kaketshirtem pass sütsütsü. School lapokba sülen kaketshirtem tatidang ka agitsü, koba taoba class nung tangazükbatem asadanga tatidang ka asütsü," ta ashi.

Maneni paisa, "state nung Covid-19 agi shiranger timba akümba temulungdang yur kaketshirtem atema summer vacation May 25 nungi June 7 tashi atsülangtsüogo," ta ashi.

Tripura nung school tem shibanga lir, saka sorkari state kübok school 20 specified category school ama sangdongtsü telemtetba agiogo. Item school tem ya state ajunga nung kaketshirtem nem jenjang aketba education agütsütsü asoshi amenokogo.

"State sorkari achaayangba school 20 mejeta shimba osang pelashishia sangdonger. Item school tem ya Model school tem nung züngoksemtsü aser item school tem yagi state nung kaketshirtem nem jenjang aketba education agütsütsü," ta education minister-i ashi.

State nung Covid-19 tensa mejungi akümba ajanga Tripura nung school tem April 17 nü shibang. School tem osang tejanga ka magütsü tashi shibanga atatsü.

Maneni state sorkari Vande Tripura ta nüngja agütsür educational channel ka amenoktsü telemtetba agiogo, koba state School Education Department-i agizükogo.

Atul Bora-i AASU office semdang; Clause 6 benoktsü nangzük



Atul Bora-i Brehostibarnü Guwahati nung AASU (All Assam Students' Union) office - Swahid Nyas semdangba noksa nung angur.

Guwahati, Monupii/May 20 (Agencies): Assam Accord minister Atul Bora-i Brehostibarnü Guwahati nung AASU (All Assam Students' Union) office - Swahid Nyas semdang.

Atul Bora, shiba yimden yimsüsüba nung majemok tsünga AASU nung sendaka liasü, pai kaketshir lokti lenirtem den sensaksemba liasü.

Pai AASU lenirtem dang takaratiba nung Assam Accord kübok Clause 6 nung keta aliba provisions tem densema Accord benoktsü tenangzükba agütsü.

Assam Accord minister Atul Bora, shiba Asom Gana Parishad (AGP) tir lir, pa ya iba portfolio abenba minister tem rongnung AASU office semdangba mezüngbuba minister lir.

"Assam Accord benoktsü atema Assam Chief Minister Himanta Biswa Sarma-i kanga süoki ia agidar. Assam sorkari iba Accord benoktsü atema AASU den sendaktepa inyaksangshitsü," ta Assam Accord Minister Atul Bora-i ashi.

Kasa mapang nung AASU lenirtemia, Atul Bora-i parnok office semdangba sülen Assam Accord benoktsü ta tamang akaba lemsatepogo.

Osangbenertem den sensaksemba mapang AASU Chief Advisor Samujjal Bhattacharya-i, Accord benoktsü ta tamang akaba lemsatepogo aser ashiba agi, 1985 küm Assam Accord nung sign asüba sülen tang mezüngbuba Assam Accord minister kati AASU office semdanga Accord benoktsü atema tenangzükba agütsüogo.

Samujjal Bhattacharya-isa, Assam sorkari Assam Accord benoktsü atema sensak asemstü asoshi AASU lenirtem yakta jaoktsü, ta metetdaksü.

"Tanü ya otsütsütsü anogo ka lir, kechiyong tang mezüngbuba Assam Accord minister kati AASU office semdangogo aser Accord benoktsü tenangzükba agütsüogo. Onok kanga pelar, saka tenangzükba mapa kuma inyakyonga ao nungang tali tepelaba asütsü," ta AASU Chief Advisor Samujjal Bhattacharya-i ashi.



TIR YIMYIM YIMOBILEM (EDITORIAL)

DIMAPUR ROGONÜ, MONUPII (MAY) 21, 2021

Israel aser Palestine rara

Tan ita May 10 nungi tenzüka Israel nunger o Palestine na tsungda kanga sashia raradagi aser tang tashi nung Israel nungertemi Palestine kubok Gaza yimti amakdang Palestine nunger nisung 227 sütsüogo aser 1620 yiruba osang lir. Ano külen, Palestine nunger nüchiso atema rarar Hamas teloki Israel yimti Tel Aviv amakdang nisung 12 sütsüogo. Atangji, tang ya Israel aser Palestine lima na prongla nung yimten junga kumteta maliba mapang ka, yimsürtemi pei jenjang ajungtsü atema rara apusodaktsür ta yimten tensa tia indang shisadangertemibo ashir. Koba kuli agi südir sang, Israel aser Palestine na tsungda raraba ya tanü tasen masü. Aji oda, alemli tejen Lai putu nung Israel nunger o Palestine nunger na raraba otsü, talisa asangur chanu David-i Goliat akokba otsü asenok mulungjangi jet ta aiter. Aji oda, Goliat akokba agiang David chuba aküm, saka chuba kümerbo pai Tsügremiti maginütsü inyak, anungji Yirusalem tenla ki yanglunüyonga pai iba tenung tajungji magitet. Pa sülen pa melen chubaba, par jabaso shisataka Solomon-sa shisamakaba aküm, iba jagi paia bendangtsür zünger mezüngma agi aser Tsüngrem kanga jashidaktsü. Pa sülen, ano, par jabaso Rehoboam-sa shisa makaba asü, iba jagi pai par nübertem madak zep ta akanga yimsü mesüteti pa dena nübertem nungi ajentsüsa aküm aser oda odabo Israel yimli ana küma aoba otsütem asenoki tejen Laishiba nung azünger. Iba sülenbo joko Israel nunger asoshi alima nung yimten yimli kecha makai parnok meketa aliba tsükchirtemiang parnok nem agütsüba lima ajak atsüngteta kari khen, kari khen ta yimsü süa aru. Ajisüaka, Israel nungertemi Yirusalem kodanga mamadoki parnok ket nung ayutsü meranga alima putu tertukuba tatemlenbo Israel nunger alima tesem balala nung prokshia oa alirtem rongnung, Zion menungraba asentenshi (Zionism) tulu adoka pei lima bushia tanaben adenshitsu apuso. Iba mapaji Israel nunger asoshi kanga tasak liasü. Iba ama mapang ka nung British nungertemi alima tongpang rara mezüng raraba mapang, 1917 küm Arab Muslim nungertem ket nungi Israel aser Yihuda lima agi Palestine lima kümer aliba lima atsüngtet aser parnok kubok ayu. Ibai Israel nunger asoshi teyari tajung ka aruba amai liasü. Iba amajika masü nungbo, nisungi bilemstü agibo, ashiko tang tashi Israel lima ta ser alima tilakata melii lila. Aji oda, British nungertemiang Israel nunger nem tangar Ottoman yimli kubok Arab nungertemi agia aliba Palestine lima tesadang ka agütsü aser iba lima jagi tanü aliba lima Israel lima kümer, 1948 kümang United Nations ajanga alima kin ka kumtetogo ta sangdong. Alemli Tsüngremi Abraham dang nangzükba lima asünungji, pa dak jakzükba kin kidong ajaki Yirusalem alidak Israel lima ya rakteper. Ibayongji, Yirusalem yimti ya Khristan aser Yihuda nungertem asoshi dang masü saka Muslim nungertemia parnok meyong yimti asütsü meranger. Atangji, Israel nungersa asüyonga Yihuda nungertemibo Yisu Khrista chirji Tsüngrem chir ta mamanger, anungji parnokji Khristan masü telok balaka. Ano, Muslim nungertem ya Abraham chir tambusang Ishmael dak nungi jakzükbatem, anungji Abraham senmang ajakji tambusang dak nungi jakzükba semchirsemnurtem meyong asütsü ta Muslim nungertemi nokdaker. Küm shia Muslim nungertemi Eid benjong (Eid-al-Adha tetezü bendanga agütsüba benjong) amongba ya Abraham-i Tsüngrem nem par chir tenlatsü mulungtetba aser pa chir melen Tsüngremi nabong ka agütsüba anogo bilemteta amongba benjong lir. Asenok tetsüngdaji, Muslim nungertemi Abraham-i Moria tenem nung tenla agütsütsü anir atuba jabasoji Ishmael-a ta amanger aser Khristan-tem Lashiba nungbo iba jabasoji Isak ta shia angur. Koba südir sang, tanü alima nung Muslim, Yihuda aser Israel nunger Khristan-tem ajak ya tebuo ka chirtem lir, ibayongji Yirusalem yimti madak kibur akümstü rakteper. 1948 küm Israel yimten yimli kumtetter külena parnok tsungda dang masü saka meketa aliba Arab kintem Egypt aser Syria na longjemmer dena raraba napang liasü, saka item ajak nungji Israel nungertem nem Tsüngremi takok agütsüba otsü lir. Aji oda, tang tesüsa 2014 küm raraba tongpang nunga Israel nungertemi Gaza dena agia adok. Iba tongpang nunga Palestine nunger 2251 asü aser Israel nungerbo sepai 67 dena ajak agi nisung 73 asüba United Nations Human Rights Council ajanga metetdakja liasü. Israel nungertemi jembibaji, tang parnok aliba lima ya parnoki mekümzüktetra, alima nung parnok alidak makatsü. Iba tangatetba nung tetsür tanur ajak sepai kümer pei lima kumzüksü asoshi nokdaker. Israel nunger nükjidongji Palestine nunger kiralongrar Hamas teloki yanglua aliba raraba oset yangludak kiojen ajak raksatsütsü inyaker. Ano külen Iran teyari agia Hamas teloki Israel lima Yirusalem yimti ajakji parnok kubok ayutsü meranger. Rara ya kanga tesashi, aser US tir Joe Bidenia rara anentsü ajungshir saka Israel nungertemi Hamas telok amakba mapa yabo maitsütetter. Atangji, tanga Israel den Abraham Tsüngrem dena lira, parnokisa akoktsü.

OLEMSABANG

COVID WARAPANG ASER WARASÜLEN AROGO TEINYAKTSÜ KAR

~ Wati Longchar (Serampore)

Tanü alima nung Covid wara agi tamajungtiba tonga alibalinükji India ya lir. Scientist aser mozü shitetter aikati tia makara, anogo shia India nung lakh 5 shi iba tashitak yagi atongtsü ta ashir. Report magütsürdangashishiko lakh 5 dak talia iba tashitak agi tongya alitsü shibai metet, kechiaser nisung aikati test masür aser sensaker aika sen makaba ajanga test mesütetba jenjang nung lir. Nisung merijang 3000 tema anogo shia asüba osang azünger. Tasü mang tali asüba agi taremdak maka, karbo arongtsü asoshi sen makabaagi tasü mang 150 tema ayong nung UP len ajungoka yutsüba osang angur. Nagaland India nung state tilabarongnung ka, saka Covid agi shiranger noklang 200 nungi 300 tema tashianogo shia zünba indang ashir, aser anogo shia tasüba ajurua arudagi. Asen kinunger, asen yimer aser külemi inyaker aika tasüba agi menepogo aser aika dang shirangdaki. TV lapokra aser social media balala reprangra Covid indang, Covid indang dang, tasüba osang dang angur. Nia, ozü kibonga, medemera iba tashidak warayagi atongdi ma ta terata, shisabulu agi tonger aliba mapang ka. Tia maka iba tashitak agi menep ka asü nungbo, hospital nung yipten ngudi ma?mozü, oxygen angutsü asü masü, sen peria ngudi ma ta tebilemstü aika agi tonga aliba mapang ka. Iba wara kobika aotsü shingia meshitetialima ajunga terata nung lir. Iba ama shia bulu mapang arogo tenyaba mapa khuret tuluba akümer ta angatetdi.

Iba ama wara mapang arogo teinyaktsü kechi?mesüra kobala mapa ka arogoi tabensaba, tajungba inyaktettsü? Alima lokti tentet balala, Govtaser tamangba yimsü telok balala ajaki Covid tashidak kotettsü mapa aika dang inyaka arudagi.

- Government mapaji nüburtemkoda anema yutsütsü iba asa-lendong yanglur, tat. agi., lockdown asütsü ozüng yanglur, koda sür mozü peria yanglutsü aser ngutettsü, mozü nübur ket koda tongtetdaktsütsü, vaccine peria koda ngutettsü, hospital koda tajungba yanglushitsü, nüburtem chiyungtsü wara agi metongdaktsü yutsütsülemang bushir, a. a. ashitsü akok.
- Administration & Police departmenti Governmenti teinyaktsü lemtetbatemtakok ngua inyaktsü sendong yanglur. Ozüng anema inyaker, tashi mangartem azüoka ayur, tat. agi., lockdown raksartem merenshitsu, azüksü, jail nung poka ayutsü, mozü tamajung ayokba, tiyazü osang prokshiba item amalaji azüoka ayur aser merenshir.
- Medical Department mapaji shirangershirnok mozüki bushia arur parnok anebalutsü, kechi tashitak agi shiranger aji investigate süa, mapang shitak nung mozü agütsütsü, operation agitsü, a.a. Parnok teinyaktsü shiranger kodaaneber kidangi pelaa yoktsü ta asüba nükjidongji asür.
- Yimtsüng nung yimsürtemi yimtsüng telongtet nung nüburtem anema yutsütsü, lokti nung liromedema yutsütsütsüzung-ozüng balala yanglur, yimtsüng telongtet nung lockdown ozüng yanglur, tashi mangartem senchi achir; Government aser lokti tentet balala den tongtepratepa nüburtem ajangzüksü parnokiinyaker.

(Maneni asüng adok nung...)

Molungzürep O

~ T. Alemba Jamir (Molungyimsen)
Lengrijan, Dimapur

Aya! ya pongmang-a ta ang sünüali. Medemsor asür Oko Shilu, na asübayabo shisatangakameshisatangtetba takoksa tia tensa kati asen sensosanger asoshi bentsür aruogo. Medemsor, na taküm ali amai khen tetshiti. Na asübayabo kecha dena asadangtsü makokba aser kumolungjang nung nembanga ayutsü makokba, ni aser sensosanger ajak asoshi takoksa ulura ya koda asütsü?

Shiti süra alima nung meimchir nem moatsüba ali rongsen takoksa dak alia, taküm tasüba takoksa, saka item ajak rongnung alia, Anjung tenari nung lokdi ajaki nükmia aliba nübu ka sama nungji, ozü akümlir medemsor-i nemjema bilemer-a ni. Auh ni, koda asütsü akümlir ajaki menakdangtsübaji iba tasüba ya lir.

Sasar ako, 12th May 2021, Bodbar nikongdangji bilema marunür. Asen Senso aser medemsortem arudangbo nü jak mesayu. Nu tanela meyütsüngbar kima ajanger Dephu lima tonger liasü. Ayah! ta shi nung metsüka-a bilemerko. Saka arizüka meyütetba tako marok agi na meneper liasü. Tsa-a ta bilemerko to.... Saka tiatsüba nungi rakzuka ayutsü makokba agi na meneper liasü. Nai tenzüka arur yutsüba mapatem ya akümlir asoshi ulura. Ni ang masü, nai tenzüka aruba maparen balala asoshi, Sensosangeri na menungra-a nü tsüngnep nemjema bilemer.

Nü dak tesüngjem shisatsü agi khurettem kodang arudir temoatsü ka ama züngshia khurettem süidaktsü. Aya, bilemdanga ora medemsor aika rongnungi kü shisa sadok-sadoka, ayuba medemsor ka na liasü. Oh! nü medemsor nüktzü ayimer, saka akümlir teyimla ka lir. Asenok alishi ya tempangaka nabo teti tatem makaba tanelaji naibo ajangzükkerko ta onok tamang aser teyimla. Iba jagi onok molungzürep süngzükker.

Auh ni, pongmang to asangsang ang kümerko, nü tanela to agi mongzü ozü ka kümer kilem kolak nung ayipzüa sünüdang na taküm ali ama nü meim kinungtsü, jala, jabasotem aser medemsortem asüktema ajeber. Nü sempet tajungji akümlirtemi nükmia bilemer ta nü medemsor molungzürep o yangi atemer.

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger angateta agitsü mepishir**

PBS-i sayutsüngir asür, Billy Graham indang documentary ka saya



Dr. Billy Graham (1918-2018)

May 18, 2021: Alima nung nungtugu sayutsüngir asür, Rev. Billy Graham-i pa akümüli mapang nung pai sayutsüngiba ajanga nisung million aika Khrista dangi anir arua liasü; pa taküm otsü nung ajemdaker Public Broadcasting Service (PBS)-i documentary tasen ka sayaogo.

Hombarnü sayaba documentary film tasenba nungji Billy Graham-i inyakba evangelism mapa dang masü saka pa nija taküm otsü aser Yisu sülen anidaker ka ama pai anogo shia inyakba mapatem indang lir, ta osang ka ajanga metetdaksü.

Ghonda ana documentary film nungjaji 'Billy Graham' lir aser iba film ya PBS Emmy Award-winning history series American Experience shilem ka lir.

Kasa documentary nungsa Billy Graham-i sayutsüngiba dang masü saka America nung yimtenren nunga pai temelenshi adokdaksüba indang lir.

Film nungsa America nung evangelical movement nung pai shilem agiba aser pai pa dak aliba sempet amshia alima tesem balala nung Khrista osangtajung prokba indang lir.

Iba film ya Helen

Dobrowski-i produce asü, Sarah Colt-i direct asü aser executive producer ji Cameo George lir.

Tasodang William Franklin Graham ta ajasang, Billy Graham ya World War I tembangsü anogo pezü dang lia 1918 kum November 7 nü Charlotte, North Carolina anasa aliba farm ka nung aso. Great Depression mapang pa mamatzü farm ka nung intetdang pai akümüli nung pei dak aketba sempet tajungtiba amshitsü atema angazüka liasü.

Pa arrshi kum 16 asudang sayutsüngir, Mordecai Ham-i sayutsüngiba angashia pai Khrista agizük, iba sülen pai Kibuba tenzüksü atema pa dak aketba sempet tajungtiba amshi.

Dr. Billy Graham-i mezüng radio ajanga evangelistic mapa tenzük, iba sülen Youth for Christ nung tenzüka liasü.

World War II mapang lanurtem tenzüksü atema Youth for Christ ya tenzüka liasü. World War II tembangba sülen Graham-i US aser Europe tesem ajaklen sayutsüngia jaja.

Kum shia agiba Gallup poll nung Billy Graham ya 54 ben tashi "10 most admired men in the world" nung densema liasü, aser iba poll list nung kum 48

tashi atonga pa shim.

Billy Graham-i nisung ajak senteper million 210 matsüngdang sayutsüngiogo. Pa arrshi kum 99 asudang 2018 kum February 21 nü North Carolina kübok Montreat nung par kidang asü.

Pa akümüli mapang nung pai kaket aika zülü; item kaket rongnung 1971 kum sayaba 'The Jesus Generation' kaketbo mezüngbuba hopta ana tsüngda copy 200,000 tashi ayok.

Pai züluba kaket aika rongnung kar yamai lir- Calling Youth to Christ (1947), America's Hour of Decision (1951), Peace with God (1953, 1984), Freedom from the Seven Deadly Sins (1955), The Secret of Happiness (1955, 1985), Angels: God's Secret Agents (1975, 1985), How to Be Born Again (1977), The Holy Spirit (1978), Till Armageddon (1981), Answers to Life's Problems (1988), Hope for Each Day (2002), The Key to Personal Peace (2003), New York Crusade (2005), Wisdom for Each Day (2008), The Heaven Answer Book (2012), The Reason for My Hope: Salvation (2013) aser Where I Am: Heaven, Eternity, and Our Life Beyond the Now (2015) densema lir.

Chhattisgarh nung Khristan kibongtem loktiliba nung sendoker

May 20, 2021: Yaküm November ita nung Chhattisgarh State kübok yim ka nungi Khristan kibong 14-i Khristan yimsü toktsür tribal yimsü dangi meyiptsü memelungba agi parnok nem sorkar teyari balala magütsütsü atema ration card rakzüka ayu, aser tang tashi parnok loktiliba nung sendoker, ta International Christian Conceren (ICC) osang ajanga metetdaksü.

Yaküm November 24 nü Sukma district kübok Ekpai yimdak Hindu yimsü alia amanger telok kati Khristan kibong 15 anema apusoba mapang nung Khristantem indang ration cards rakzüka liasü, aser iba mapang nungjaji

tenzüka tang tashi Khristantem anema inyaker.

Khristantemi police nem ken o agütsüba sülen ita ana shi lir parnok indang ration cards meyi pa agütsüogo, ajisüaka tang tashi yimdaklirtemi Khristantem sendoka parnok dang nungi kecha shishilemba masür.

ICC den jembidang Bhima Sodi-i, "Yisu sülen anidakba agi Ekpai nung Khristantem maneni timtemer. Onoki (Khristantem) sobaliba yimsü toktsür bendanger yimsü amanger, ta parnoki tai tongloktsür," ta metetdaksü.

Paisa, "Tang tashi yimdaklirtemi item kibongtem dang tribal yimsü dangi tanaben

meyiptsü ajungshir. Timtem maremi kibong katibo tanaben akhi yimsü dangi meyipogo. Khristantem sendokba ajanga onoki timtem maneni ajurur," ta ashi.

Khristantem tanaben tribal yimsü dangi meyipdaksütsü nukjidong nung yaküm November ita nungi tribal lenirtemi Khristantem loktiliba nung sendoker.

2014 kum Centre nung BJP sorkar aruba sülen Chhattisgarh nung Bastar district kübok yim 50 dak tema nung Khristan yimsü amangbaji ozüng alema, ta bangzüng ka renemogo aser iba ozüng kübok yimtsüngtem nung Khristan kibong noklang aika sendoker.

ANOGO ABEN TSÜNGREM DEN

Ngutetetsüsa alidang bushiang

"Kibuba ngutetetsüsa alidang pa bushiang, Pa anasa alidang nenoki pa ja-ang" Isaia 55:6

Alima nung tzünglu teti marur, anü teti mapur, mopung teti maoner mesüra süngdong nung süngjang teti tangdaka malir. Ajak asoshi mapang ka lir. Tsüngrem ajurutsü asoshi lenmang sadem-sadema lapoka lir, saka Tsüngrem angutsü maongka teti malir. Kodang meimchir ka taküm tembanger südir, Tsüngrem bushitsü tamakoktsü. Yisu kodang tanaben alimai arudir, taochi putu süitemtsü anungji Tsüngrem mebushitetsü. Anungji taküm alidangsa Tsüngrem bushitsü nungdaker, taochi süitemerbo jeba mepishiaka Tsüngrem majurutetsü. Ibri 3:7 Tanü asenoki Pa ola angashira nenok temulung temerang.

Alima nung meshimetsür Lazar kotak ajanzük, saka takatait sang molumi nung timtem tekangshi tebang agi jembitsü makok, saka molumi aoter asoshi teasasatsü tulutibaji Tsüngrem kodanga majurutetsüsa arrlaji lir. Asenok asoshi taochi alidang Tsüngrem bushidi. Asenoki asen temenen nangzükra, asenok dang temenentem adoktsü aser memeshiba ajak nungi asenok merüdaktsütsü, Pa temulung lemtetba aser ochi lir. 1 John 1:9

Sarasadem

Temeim Tsüngrem, na metetsü asoshi, Yisu Khrista taküm tenla agütsüba asoshi kanga pelar. Kü menen nangzükra aser ni taküm tasen nung anogoshia Ne den jajadakjangma. Amen

Kachin State nung Arogotemi refugees nem teyari agütsür

May 20, 2021: Taküm tejenokdak, chiyungtsü, aser February 1 anepdang nungdaksa osettem agütsür; Myanmar nung sepaitemi iba dak alia Arogotem nung Aung San Suu Kyi densema bendenba tenla aser Lenten democracy lenirtem aika puer funds nungi temeim mapa sepaitemi yimsüsüba tenzükba inyaker, ta metetdaksü. sülen Burmese Army Paisa, "Mansi town nung (Tatmadaw) aser Kachin maneni injang ola angashir Independence Army (KIA) na aser tensa mejungi lir. Momauk jila nunga anogo tsüngda rara ano tamajungba kumogo. asem tashi sashia raraogo," ta

2011 kum nungi Burmese Army aser KIA na tsüngda Arogotem aser tanga rarar aser tang Kachin aser tamangba yimsü teloktemi Shan state na nung refugee Kachin province nung jenshia 166 nung refugees 1,00,000 alirtem yaribaji KIA telokia dak tema lir. junga meteta lir.

Tesüiba ita asem tashi Arogotemi refugees nem northern border nung raraba chiyungtsü agüja arur, ajisüaka mapang Kachin nung alir nisung tesüiba hopta ishika Myanmar 3,000 dak tema jenshiogo, sepaitemi refugees camp-i ibayongji parnok aoba lenmang mokdangba agi jenokdaksütsü atema Khristan teyari agütsüba maparen nung nütsüng timba aliba Kachin timtem ajangshidar. State nung refugee camps Jenshia alir yimdaklirtem tasen asem amenokogo. yariba Arogo- Kachin Baptist

Osangbener den jembidang Church (KBC) chairman-i, Banmaw nung tongti putir, "Chiyungtsü belentsü atema Raymond Sumlut Gam-i, tawa sepaitemi lenmang Kachin nung nisung aika mokdangba ya onok asoshi jenshiba sülen temeim mapa tetsükdaksütem rongnung inyaktsü atema Arogoi tulutiba lir," ta metetdaksü.

OLONG PAITEP # 5818

1			2					3		
4							5			
						6				
			7							8
		9								
							10			
11						12				
13										


TIPILEN		LANGTSÜNGLEN	
2. Teka mapa tajung	- (8)	1. Anepalua inyak	- (7)
4. Anakshinüba	- (5)	2. Teptsü	- (4)
5. Süoshi agi tazü	- (4)	3. Nok agi raratep	- (6)
9. Aria bilemtep	- (7)	6. Kibong aküm	- (4)
11. Ajemalu ozü	- (4)	7. Nüji masü	- (4)
12. Tzü an	- (5)	8. Taruba küm	- (7)
13. Teben teloktep	- (8)	9. Teka shidok	- (6)
		10. Meputep/Mapet	- (4)

OLONG PAITEP # 5817 TELANGZÜBA

TIPILEN :	LANGTSÜNGLEN :
1. Yimlibilem, 4. Anak, 5. Tangar,	1. Yongya, 2. Moko, 3. Marok,
7. Aya, 8. Arong, 11. Par,	5. Teronem, 6. Nung, 8. Amajok,
13. Lemjem, 14. Oagi, 15. Mulung.	9. Jangzü, 10. belem, 12. Rong.



ALOKBAR KIBONG NUNG SENSAK ASEMER :



Polokba : Oba, sadidang ya kiyimsang aser kiyimla na ya kechiba teka amtepdaktsür?
Alokba : Waa, tsungteper ana (boxer) metsungtepdang tena teka amtepdaktsüba amai adi.
Kiyonger : Oh Alokba!

Lilir : WhatsApp

TANÜBO NAI LANGZÜANG

Q. Raman Research Institute ya ____ nung lir.
 A. Bangalore B. Chennai
 C. Kolkata D. Pune
 =====(Taruba adok nung onoki langzüksü)
YASHI ADOK TELANGZÜBA : Mathematics

AO OSHI ANGAZÜKDAK:

TANÜ ANGAZÜKTSÜBA OJANG

Jakrep

(n) tanur ana külemi asoba (twins)
 * Merenba o Moaba na ya **jakrep** lir.

Jakrep

(v) ali chipo mesüra marok ama oset raksaba (shatter)
 * Yashi ni mekümdangba agi naro metenba marok ka **jakrep**.



Tir Yimyim

Tanur asoba anogo nung salem osang den noksa angati adokdaktsünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

NAI-A YA METETTER MA?

INDIA NUNG NÜBURTEMI SAPUA ALIBA TWO WHEELER KAR: APRIL 2021

Rank	Model	Sales (April 2021)
1	Hero Splendor	1,93,508
2	Honda Activa	1,09,678
3	Honda CB Shine	79,416
4	Hero HF Deluxe	71,294
5	Bajaj Pulsar	66,586
6	Suzuki Access	53,285
7	Bajaj Platina	35,467
8	TVS Apache	29,458
9	TVS XL	25,977
10	TVS Jupiter	25,570

SUDOKU # 5861

TELANGZUBA # 5860

6	7	9	3						4	2	9	3	7	6	1	8	5
4			7	9	2			6	8	3	6	4	1	5	7	9	2
	1		5	8	6			4	5	7	1	9	2	8	3	4	6
		8							6	9	8	7	5	3	2	1	4
		3	1	6	8	2	9	7	3	4	7	1	8	2	5	6	9
2		7		5	9	3			2	1	5	6	9	4	8	7	3
						9			9	8	3	5	4	7	6	2	1
8	5		9	2	1				7	5	4	2	6	1	9	3	8
9	3			4	7	5	8	2	1	6	2	8	3	9	4	5	7

OJANG LUTEP # 5404

NYAKMEITSÜ :
 RAMESÜ :
 LITETMETSÜ :
 UNGSERN :
 KTSINYAÜ :
 MAA :
 MBIJEA :
 TTSLITEÜ :
 AAM :
 AYSU :

OJANG LUTEP TELANGZÜBA # 5403

LOCKDOWN MAPANG NISUNG AIKA PEI MAPA MEINYAKTETI SHISABULUA TIMTEMA KAZÜR

TAN HOPTA ATEMA - KOMA SÜLA ?

Q. Covid mozü kidang inyaker doctor, nurse aser staff-tem asoshi anogo shia chiyongtsü mozü ki anasa aliba arogotemi longjemer agütsü nunga koma süla ?

Pinarayi Vijayan-i tangagi tanabenbuba Kerala CM tenangzükba agi



May 20, 2021 nü Kerala yimtiba, Thiruvananthapuram nung Pinarayi Vijayan-i (abelen) Chief Minister inyaktü atema tenangzükba agidang tangokba noksa nung angur.

New Delhi, May 20 (Agencies): Brihostibarnü CPM lenir, Pinarayi Vijayan-i tang agi tanabenbuba Kerala Chief Minister inyaktü atema tenangzükba agiogo.

Kerala nung küm aika Left Democratic Front (LDF) aser United Democratic Front (UDF) nati melentepa yimsüsüa aruogo saka tang mezüing CPM-i kümsük ana atonga state yimsüsütsü.

Kerala yimtiba, Thiruvananthapuram nung aliba Central Stadium nung

sentong tongmelang ka agidang state Angh, Arif Mohammed Khan-i ketdangüsü arrshi küm 76, Vijayan nem chief minister tenangzükba agidaktü.

Chief minister, Pinarayi Vijayan-i, taoba mapang health minister KK Shailaja densema tejenpurtem ajak shimdoker team tasen-i state nung LDF sorkar akümtsü party-i telemtetba agia liasü, ta metetdaktü.

Coronavirus tensa nung ajemdaker tenangzükba agiba

sentong nung Opposition Congress-UDF lenirtem shinga maden.

Bodhbarnü Kerala High Court-i sorkar dang tang wara aliba nung ajemdaker tenangzükba sentong nung adentsü atema nisung ishika dang jaoktsü metetdakja liasü.

CPM-i Pinarayi Vijayan-i aniba sorkar nung tasenpurtem dang shimtsü telemtetba agiba ajanga cabinet tasenba nung nüngtugu health minister, KK Shailaja-a mezüingsem.

India nung ano nisung lakh 2.76 dak covid putet aser 3,874 asü

New Delhi, Monupii/May 20 (Agencies): India nung ano nisung 2,76,110 dak coronavirus putetba sülen linük nung coronavirus case ajak agibo 25,772,440 jungogo, ta Brihostibar anepdang Union Health Ministry-i metetdaktü.

Tesüiba ghonda 24 tsüingda nungsa coronavirus tashidak agi 3,874 asü, aser linük nung iba tashidak agi asür ajak agi 2,87,122 jungogo.

Tang India nung coronavirus agi teshirangdakpur 31,29,878 lir, aser ibaji coronavirus caseload nungi shilem 12.14% lir aser shiranger anepba shilem 86.74% jungogo.

Brihostibarnep Indian Council of Medical Research (ICMR)-i, India nung May 19, 2021 tashi nung samples ajak agi 32,23,56,187 tendangogo, aser iba nungji Bodhbarnü samples 20,55,010 tendangba

densema lir, ta metetdaktü.

Tesüiba hopta ana tsüingda India nung Covid-19 case rate ajema kümogo, ta Union health ministry data ajanga metetdaktü.

April 29 nungi May 5, 2021 tashi nung linük nung district 201 nung Covid-19 case ajema aküm aser May 13 nungi May 19 tashi nungbo district 303 nung covid case ajema kümogo, ta Health Ministry-isa metetdaktü.



May 20, 2021 nü Hyderabad nung aliba ENT Hospital ka nung Black Fungus agi shiranger ka Mucormycosis ward nung yariba noksa nung angur.

May 25 tashi nung Cyclone Yaas-i Odisha aser Bengal kongshitsü: IMD

New Delhi, May 20 (Agencies): Tang Bay of Bengal nung yipru mopung ka kümtetdar, aser May 22 tashi nung north Andaman Sea aser east-central Bay of Bengal nung 'low pressure area' kümtettsü, ta Bodhbarnü IMD-i metetdaktü.

Iba cyclone dang 'Yaas' ajatsü, koba tetezü tejashi. "Iba yipru ya north-westwards tsütsüleni aotsü aser May 25 nikongdang tashi nung West Bengal aser Odisha tzüyimkümlen atongtsü," ta Indian Meteorological Department (IMD)-i

metetdaktü. Iba yipru kümtetba ajanga May 25 nungi Odisha, Bengal, Assam aser Meghalaya tesem aika nung tzünglu sashia arutsü, ta parnokisa metetdaktü.

"May 23 nungi iba mopung ya ghonda ka nung kilometer 50-60 tashi kera aontsü; ghonda ka nung kilometer 70 tashia kera aontsü. May 24-26 anogotem nung central Bay of Bengal aser north Bay of Bengal aser May 25-27 tashi nung Odisha-West Bengal-tzüyimkümlen atongtsü," ta IMD-i metetdaktü.



May 20, 2021 nü Budgam district nung door-to-door campaign kübok health worker kati coronavirus tendangtsü atema tetsür ka dak nungi sample agizükba noksa nung angur.

PM-i ayongba senden nung CM tem nem mejembidaktür: Mamata

New Delhi, May 20 (Agencies): Brihostibarnü TMC tongti lenir aser West Bengal chief minister, Mamata Banerjee-i, Chief Minister tem ajak tangar nem anishidaktüba tanur kazütsü ka ama kümogo aser Ato kilonser, Narendra Modi-i ayongzükba sendentem nung Chief Minister tem o jembitsü memelar, ta ashi.

"O jembitsü atema state tem nem o jembitsü memelara kechiba state tem ajar?. O jembitsü memelaba atema chief minister ajaki ola adoktsüla," ta lai ashi.

Taküm April ita nung Ato kilonseri state balala nungi chief minister tem den senden amenba mapang nung Delhi Chief Minister, Arvind Kejriwal-i pai jembiba live yoka liasü; iba atemaji Ato kilonser aser BJP napronglai Kejriwal-i inyakyim alema inyak, ta aija liasü.

Senden tembangba sülen Jharkhand Chief Minister, Hemant Soren-ia, Ato kilonseri pa kijai jembiba dang nungibo state temi ashiba o-a angadangtsüla, ta ashi.

Mongolbarnü Ato kilonseri DMs den senden amenba sülen

Delhi deputy Chief Minister, Manish Sisodia-i jembiba o ka ajanga mangatettep adok.

Tamalen BJP-i Kejriwal aitsüba dak sendakba nung Sisodia-i Hindi oshi nung twitter ajanga, "Tanü senden nung Ato kilonseri jembiba live telecast süogo. Taoba mapang senden nungbo chief minister Arvind Kejriwal-i jembiba live telecast asübaji inyakyim alema lir ta aija liasü. Tanü inyakyim atemabo live telecast asütsü atema temelaba agütsü asü?. Koba senden live telecast asütsü aser koba masütsü, ibaji komaser metettsü," ta aitsü.

Ano külen tanga osang ka nung, Mamata Banerjee-i shidi ka ajanga Ato kilonser dang state aser Central sorkar mapa inyaker ajak nem vaccine agütsütsü atema state nem coronavirus vaccine dose lakh 20 bosa agüjang, ta mepishio.

Mamata-i, "Bengal nung onoki frontline workers aser sector balala nung mapa inyaker nem vaccine agütsütsü inyakyim tenzükogo. Sorkar mapa inyaker ajak nem vaccine agütsütsü atema onoki tajemba agia vaccine dose lakh 20 nüngdaker," ta metetdaktü.

Guatemala tepuokdak nisung aika tekolak tangzuka yok



Guatemala City anüolen tsütsü kilometer 205 pilar Quetzaltenango department nung aliba Cantel Prison nung rongrong adokdak asüba tepuokdak alir tasü mang ka police temi bener aoba noksa nung angur.

Guatemala City, Monupii/May 20 (Agencies): Guatemala anüolen tepuokdak ka nung telok ana tsüngta raratepa yangji alir nisung tenet asü, kong asürtem timba tekolak tangzuka yokyer liasü, ta kettangsurtemi ashi.

Bodhbarnü azüdokshiba sülen Cantel Prison nung tensa azüoktsü atema police noklang aika yoka lir, kong Mara Salvatrucha gang aser par tsükchir Barrio 18 nungi züngsemtem yua lir.

"Yangji alir nisung tenet asüba jangja lir," ta Ministry of Interior ajanga sangdong ka nung ashi aser ibai rongrong tulu adokba lir, ta ashi.

Linük yimtiba, Guatemala City nungi anüolen tsütsü kilometer 205 pilar aliba Cantel Prison nung nisung asüba indang ya Prosecutor's Office-ia jangjatsü, aser yangji inyaktertem tepuokdaka oa liasü.

National Civil Police (PNC) indang odongtar Jorge Aguilar-i osangbener dang ashiba agi, telok ana tsüngta raratepa ajanga azüdokshi ya atalok aser tepuokdak alir trok tekolak

Nükjidong matalok tashi Gaza nung bomb pokloktüsü: Netanyahu

Gaza City, Monupii/May 20 (Agencies): Brehostibarnü Israel indang fighter jet temi Gaza Strip nung maneni maka Palestine nung ka tepset aser aika yirutsü, kechiaser rara anentsü atema linük balalai ajungshiba Ato Kilonser Benjamin Netanyahu-i magizüker.

Anogo 11 azüdokshiba nung tanur 65 densema Palestine nung nisung 230 shi takum samaogo aser ano nisung 1,710 shi yirua lir.

Israel tsütsüa nisung 12 tepsetogo.

United States Tir, Joe Biden-i Bodhbarnü Netanyahu den Gaza nung atalokba indang jemi aser pa dang rara ajema ceasefire yanglutsü imlar, ta shia liasü.

Saka Biden-i phone ajanga jembir mapang tatsüka lir, Israel nükjidong matalok tashi Gaza nung maneni bomb pokloktüsü temolungtetba lir, ta Netanyahu-i ashi.

UN Security Council ajanga Israel aser Gaza indang Hamas yimsüsür tsüngta rara anendaktsüsü merangba nung terenlok mali, aser US-i maneni iba ken o nung mera agiba nokdang.

Tang Israel-i Gaza Strip nung amakba mapang sen million \$322 alang ki-o-jen raksatsüogo, ta Gaza nung aliba Government Media Office ajanga ashi.

Nisung aliba residential tower 184 aser media center 33 aoyi kuma poksatsüogo



Ato Kilonser Benjamin Netanyahu

aser yangji sen million \$92 jenjang akoksa.

Iba den ano housing unit 1,335 dak tema okshia mesüra kanga mejungi raksatsü aser ano 13,000 shi tera raksatsür lir.

Brehostibarnep Gaza north tsütsü Israel mitkartemi tayimtsü amshia Hamas ki-o-jen nung noklang ka ben dak tali amak, aser Hamas-ia meyipar rocket khaloktsü.

Gaza nung yimsü asüba Hamas telungpur telok nung kettangsur kati, Israel den anogo ka mesüra ana tsüngta

ceasefire alitsü imlar, ta ashi. Saka Israel Ato Kilonser Netanyahu temolungtetba ano memelenshi lir.

Occupied East Jerusalem nung Israel aser Palestine nung tsüngta mangatetep adoka Muslim aser Yihuda nungeri temeshi ta züngshiba tesem nung rongronga hopta ishika arur Gaza nung iba rara ya tenzük. Israel nung dang iba temeshi tesem nungi ainshitsü atema amokmerena Hamas-i rocket khaloktsü aser iba mangyanga Israel-i tayimtsü amshia Gaza nung amak tenzük.

Capitol nung rongrong agütsüba bushisüngdangtsü akok

Washington, Monupii/May 20 (Agencies): Democrat temi amokbanga aliba US House of Representative nung Republican telokia busema Capitol nung rongrong agütsüba bushisüngdangtsü atema vote agütsüogo.

Republican züngsem semer-ser pongui par party lenir aser taoba Tir Donald Trump sülen manidaki Democrats den külem sür 252-175 nung bushisüngdangtsü vote agütsü.

Trump-i Republican züngsemtem dang "Democrat sang asoba" anema vote agütsüsü ajungshia liasü.

Ajisüaaka iba bill ya chamber temaba majangtetsü amai lir. Senate nung Republican lenir Mitch McConnell-ibo ibai ken o ka-len nungi dang asü dangba lir, ta ashi.

New York aser Washington nung 9/11 lendong agütsüba bushisüngdangba yimya nung iba ken o ua bushisüngdangtsüa yanglutsü akok.

Telok ana tsüngta kasasa lemdangba züngsem ter agi akumba telok ka tenteta küm tatem tashinung tarutsü nung Capitol sabangtsü merangba

nungi kumzuka ayutsü indang onüktem agütsüsü.

November election nung Tir Joe Biden-i takok anguba indang kuli agütsüsü asoshi Congress nung January 6 nü adenshia alirtem aridoktsü atema Trump busemer Capitol telungi ai.

Bodhbarnü vote agütsüba ya Republican telok nung taoba tir busemer ali mali tendangba ka amai angur.

Republican telok nungi iba onük busema vote agütsür lenir 35 rongnung ya Capitol nung rongrong agütsüsü atema Trump-i ajungmeso ta aija vote agütsür House Republican ter prong dena lir.

New York nungi congress züngsem John Katko, shibai iba legislation atema Democrats den jembia liasü, pai "Iba ya yimtenren tsütsü telok balala indang masü saka shidakba atalokba indang lir," ta ashi.

"America nübur aser Capitol Police nem telangzüba agütsüsü langa lir, aser tarutsü nung iba ama mataloktsü asoshi tekeratiba nung teinyaktsü mapa inyaktsüla," ta House Homeland Security Committee

Republican lenir Katko-i ashi.

Saka Georgia nungi Republican züngsem, Marjorie Taylor Greene-i commission ya Democrat temi Trump busemermet meji-menentsüsü atema benokba lir, ta ashir.

Vote agiteptsü mapang tatsüka lia Ohio nungi Democrat züngsem Tim Ryan-i House floor nung, "Capitol tekolaki nisungtem atu, Capitol Police dak lead pipe amshia tekolak nung azük, aser asenoki telok ana tsüngta tangatetep kati marutettsüna? Iba linük nung ano kechi ataloknung ang asenok lungjemer nokdaksü?" ta asündang.

Saka Senate nung iba legislation timla kangabo mangur, kong iba ozüng ya agizüktsü atema Democrat teloki Republican züngsem ter nüngdaksü.

Chamber temaba nung deputy Republican leader, John Thune-i ashiba agi, iba bushisüngdang ya 2022 election cycle nung yimtenyimsüsür indang nok-o-nü ka ama amshitsü ajema bilemer.

Trump ya tir menden nungi

aluba sülen Florida aser New Jersey nung pa indang golf club nung munga senzür aser pa o nung ano 2024 nung White House atema tokteptsü amai angateter.

Taoba küm election ya pa dang nungi auyaba lir, ta pai maneni kuli magütsütemi jembia jajar aser pai iba ama angatetba yong January 6 nü pa busemermet jenti Capitol Hill telungi ai.

Iba mapang tetsür ka nok-o-nü maben liaka House chamber telungi aitsü merangba mapang police temi khaseta liasü. Iba rongrong atalokba tialong nung longkak aiter ana temolungjang agi mapa junga meinyaki asü aser ka amphetamine mozü tali chir asü.

Longkak aiter azüokba Capitol Police ka iba lendong ataloker tasüngji stroke agi asü. Anogo ishika lir police ana pei sasa takum agia liasü.

Iba rongrong nung police ka tenük raksa aser ka tekolok yiru, ta Capitol Police union ajanga ashi.

January 6 anepdang Trump-i tweet ka nung, "States-i vote aibelena aliba melenshiner, koba

tim masüba yimya amshia inyakba nung ajemdaker lir ta tangbo metetogo, aser iba den bendenloksema ochimashi maparen kodanga legislative nungi temelaba mangu. Mike Pence-i inyaktsü ajak agi parnok States-i meypa yoktsü aser asenoki akoktsü. Mike aji inyakang, tang ya temolung ulutsü mapang lir," ta zülutsü.

Mapang tatsüka lir Trump-i Washington nungi jembiba mapang pa busemermet Capitol nung adenshitsü ajungshia.

"Yangi adenshia alir ajak yakta Capitol building-i linük meima yimjung nung nü ola angashidakja aotsü ta ni meteta lir," ta pai ashi.

Minute ishika lir House of Representatives Speaker Nancy Pelosi-i Biden nem tir election akokba kuli agütsüsü maparen tenzük, aser iba mapang Trump busemer meyirijang aika Capitol kima adenshia liasü.

"Asenoki raratsü. Nai merara asen linük malitsü. Anungji asenok ayamesoti," ta Trump-i ayongzuka pa o tembanga liasü aser iba sülen pa busemermet Capitol telungi ai.

Lt. KIBANGWAR JAMIR SÜR KÜM ANA AJUNGER



MARCH 18, 1938 - MAY 21, 2019

"Kibuba temeim tulu kodanga manener ; Pa taochi kodanga tatem maka ; Anepdang shia parnokji tasen; Pa temulunglemtet tulu lir." Aiatai 3:22-23.

"A well-lived life is a legacy of joy and pride and happiness, a loving, lasting memory our grateful hearts will treasure."

Na onok toktsür kotak limai aoba sülen tanü küm ana ajunger. Onoki na meblemteiang anogo kata mesüidaktsür. Na onoki menguaka aser mangashika, na onok anasa teti lir aser onoki na kanga menungra a bilemer.

- Temeim kinungtsü, chirnur, anükapang aser semchirtem.

Tepela Lemsateper



ASO :
10.07.1950

ASÜ :
19.05.2021

Tsürabur asür **A. Narola Aier**, Waromung (W/o. C. Wati Jamir, Longjemdang), Tsüngremi lemkütsüba kümzük anogo agi tonger May 19, 2021 anogo nung la iba akümüli toktsür pilaa ogo. La manemi aliba mapang nungi tangola madang tashi kija aser lokti balala shirnokisa nübu, mapang, shisatsü, rongsen aser sarasadem agi nungita yaritepogo, ajak dang Tsüngrem tenung nung tepela lemsateper. Nenok mapa tajung asoshi ajak takoksang Tsüngremi maneni molamoshia moajangma.

Temeim Kinungbu, Chirnur Semchir & Kinungertem.

'Netflix India' indang Director mapa nungi anenogo



as er
jan gratema
inyakogo. Iba
wadang nung
tenzü kba
mapang
inyakyimtasen
jenti
angazükba
denkü nemiba
maongka tulu
agütsüba
asoshi pelar.
Director ama
mezü ng
inyakertem,
tetsür film

Mumbai, Monupii/May 20, 2021 (Agencies): Srishti Behl Arya, shiba International Original Film den streaming platform Netflix indang Director inyaka liasü, lai iba mapa toktsüogo.

2018 küm Arya-i alima nung streaming sabang tetsüti - Netflix nung aden aser tawa adokba Project aika iba sabang ajanga sayutsü asoshi la ajanga temelaba agütsü. Iba maparen dak sendakba nung lai Monika Shergill dang osang metetdaksütsü, shibai 2019 küm iba wadang nung dena India Content team anir maparen achaayanga arudar.

Srishti Behl Arya-i ashiba agi, "Tesüiba küm asem nungi India nung Netflix originals film team den külemi inyaka arudang tajangshiba tasen aika ajuruogo

yanglurtem, kentener tajungtem aser actor tasentem indang sempet sayutsü maongka tajung nguogo. Tarutsü nunga maparen maneni takok nguyonga bener aotsü asoshi iba team dak teimla tulu lir aser parnok wadang ajanga nübur tali atsüa arutsü yongyar."

Srishti Behl Arya ya film producer - Goldie Behl's sister aser Bollywood actress Sonal Bendre'er adianu kinungtsü (sister-in-law) lir. Küm aika tajangshiba tajung aliba den, Srishti Behl Arya-i Netflix atema original film talisa 'Kiara Advani indang 'Guilty', Anil Kapoor indang 'AK vs AK' aser Anushka Sharma-i produce asüba 'Bulbul' sayaogo.

Bollywood tsütsü, lai film talisa 'London Paris New York' aser 'I, Me aur Main' yangluogo.

'Friends Reunion' May 27 nü sayatsü

New Delhi, Monupii/May 20, 2021 (Agencies): Ita ishika thitema arur sülen, kanga dang yonya ataba 'Friends' reunion special sayatsü anogo sangdongogo.

Iba show nung original cast züngsem trok - Jennifer Aniston (Rachel), Courteney Cox (Monica), Lisa Kudrow (Phoebe), Matt LeBlanc (Joey), Matthew Perry (Chandler) aser David Schwimmer (Ross) nungeri 'Friends: The Reunion' nung tanaben shilem agiba angutsü.

COVID-19 tenokdangba ajanga iba 'special show ya sayutsü atema ishilen ka anogo

atsülangja liasü. Iba show ya 2020 küm February ita tangoktsü renemer liasü, saka taküm April nungang show tangoktet. Friends reunion ya Burbank nung Warner Bros. Studio kübok Stage 24 tangokba liasü.

Warner Bros Unscripted Television den Warner Horizon, Fulwell 73 Productions, aser Bright/Kauffman/Crane Productions longjemer 'Friends: The Reunion' yangluogo.

May 27, 2021 nü iba show ya US nung sayatsü. Ajisüaka, India nung 'Friends: The Reunion' sayatsü atema ano osang magütsü.



Nagaland Bible College

Accredited by Asia Theological Association

Artang Ward, Mokokchung, Nagaland - 798 601.

ONLINE ADMISSIONS OPEN FOR 2021-22 Academic Session

Accreditation	Courses	Duration	Eligibility
ATA	Master of Divinity (M.Div.)	2 Years	ATA - B.Th. with B grade and above.
		3 Years	Any recognized Bachelor Degree / Non ATA B.Th.
	Bachelor of Theology (B.Th.)	3 Years	10 +2 or Equivalent
	Diploma of Theology (Dip.Th.)	2 Years	10th Pass
Non- ATA	Master of Divinity (M.Div.) D.L.	3 Years	ATA - B.Th. with B grade and above.
		4 Years	Any recognized Bachelor Degree / Non-ATA B.Th.
	Certificate of Theology (C.Th.)	1 Year	8th Pass

Last Date to Apply: June 10, 2021

Apply Today by following any one of the simple steps given below:

- Scan the QR code to apply online:

OR

- You may visit our website: www.iicsmokokchung.com/nbc/application-2/

OR

- You may contact us : +91 94366 07340, +91 90898 68226,

+91 98565 44584, +91 96124 14989, nbcsmokokchung@gmail.com

Security Forces-i nisung pezü apu



angazükba nung ajemdaker, Security Forces den State police longjemer Nihokhu aser Eros Line, Dimapur tesem mita aoba mapang team-i nisung pezü ya apu aser parnok ket nungi sen lakh 7.2 alang yi jenti ngutet.

Iba maparen dak sendakba nung maneni bushisüngdangtsü atema pua alir nisung pezü aser parnok ket nungi ngutetba yi ajak East Police Station, Dimapur District nung agütsüogo, ta kasa sangdong nung shia lir.

Dimapur, Monupii/May 20, 2021 (TYO): Mongolbarnü (18.05.2021) Security Forces den police longjemer team kati Nihokhu aser Eros Line, Dimapur District mita aoba mapang, ozüing alema yi belener nisung pezü puogo, ta sangdong ka ajanga metetdaksü. Osang tejangja ka

Juventus-i 14ben buba Italian Cup kokogo



Reggio Emilia, Monupii/May 20, 2021 (Agencies): Bodhbarnü, Italian Cup final asaya nung Juventus-i goal 2-1 agi Atalanta tsükdakja parnoki 14ben buba iba asayamung takok nguogo. Küm ka tashi terepranger medeni iba Cup asaya arur sülen final asaya atema terepranger melaa liasü.

Iba asaya mezüing aser tanabuba half nung Juventus nungi asayar Dejan Kulusevski aser Federico Chiesa nati goal ka ka idaktsüba ajanga coach Andrea Pirlo-i iba season nung tanabuba takok marok ngua liasü. Andrea arishi küm 42 ajungba anogo nung pa lenisüba kübok Juventus-i Italian Super Cup takok angu.

Atalanta coach, Gian Piero Gasperini-i mezüing takok marok angutsü asoshi maongka magitet aser 1963 küm Coppa Italia sülen Atalanta puri asaya makokba ajanga tanaben iba takok marok angutsü teimla ajunga raksadok.

Gianluigi Buffon-i Juventus atema iba final asaya nung tatembuba shilem agir alitsü aser iba asaya mapang goal keeper Buffon yagi junga asayaogo.

Prama den Buffon-i mezüing Coppa Italia takok anguba sülen, küm 22 lir pai Coppa Italia trokbuba takok angur alitsü.

Reggio Emilia kübok Mapei Stadium nung asaya tenzüker sülen Atlanta puri metsüloksüba goal ka Buffon-i kümzüka/nokdangteta liasü.

Duvan Zapata teyari ajanga Jose Luis Palomino-i mezüing goal inoktsütsü merandang, saka arishi küm 43 tain Buffon tetsüing agi ball nokdangtet.

Iba sülen Buffon-isa Zapata aser Hans Hateboer nati metsüba goal ka ka nokdangteta liasü.

Atalanta puri asaya tenzüker külen nungi Juve pur amokbanga asaya yongjia, ghonda tesadangka sülen Juventus-i mezüing goal idaktsü.

Cristiano Ronaldo-i Atlanta goal tsütsü ball bener alu, saka parnok tsüingda ball raktepba mapang goal anasa Weston McKennie-i Kulusevski dangi yok aser pai minute 31buba nung Juventus atema mezüing goal inoktsü.

Ajisüaka, minute 10 sülen Atalanta atema Ruslan Malinovsky-i goal ka idakja

mezüing half nung telok ana tsüingda goal kasa 1-1 kümamadok.

Asaya ghonda ka (tanabuba half) ajungtsü lia Kulusevski-i Juve atema tanabuba goal idaktsütsü merandang saka Pierluigi Gollini-i iba goal nokdanga liasü.

Ronaldo teyari ajanga Chiesa-i minute 73buba nung Juventus atema goal tanabuba idaktsü. 2018 nungi Juventus puri mezüing Coppa Italia takok angur alitsü. Taoba küm Napoli den final asayaba mapang, parnoki runners-up jenjang ajangzüketet.

2019 küm final nung Atalanta puri Lazio makok.

Iba final asaya (Coppa Italia 2021) nung Ronaldo-i goal ka danga meinoktsütet, saka Europe indang tongtibang league pungo nungi asem - England, Spain aser tang Italy nung Ronaldo'er teloki takok marok angur alitsü.

2020 küm March ita nungi coronavirus tenokdanga ajanga terepranger marudaktsü arur sülen iba final asaya atema Stadium nung terepranger 4,300 tashi melaa.

Sri Lanka Tour atema Rahul Dravid head coach inyaktsü



New Delhi, Monupii/May 20, 2021 (Agencies): July ita India ODI squad pur Sri Lanka tour atema National Cricket Academy chief aser taoba mapang India captain Rahul Dravid head coach ama inyaktsü terenemba lir.

Dravid, shibai Bengaluru nung NCA tekolakba ama mapa agizüker sülen India A aser U-19 team anaprongla den külemi

mesenzüi aküm, Ravi Shastri melen India ODI squad atema pai head coach ama achayangtsü. Kasa mapang Ravi Shastri-a India Test squad den külemi England-i aotsü," ta BCCI otongdar sangdong ka ajanga metetdaktüsü.

May 17, 2021 nü BCCI sangdong ka ajanga angazükba agi, iba ODI tour atema Dravid nem maparen nüngloksütsü

lemtet.

Bowling coach Paras Mhambrey-a support staff züingsem ka ama squad nung adentsü.

July ita Sri Lanka nung India team-i ODIs asem aser T20s asayatsü imlar, saka iba tour atema anogo aser asaya telemsa memetdaktüsü.

Iba squad (ODI) nung asayar tajung aser ODI bowler takotet tem shima asayadaktüsü sentong lir.

Ano külen, iba Tour dak sendakba nung captain atema Hardik Pandya, Shikhar Dhawan aser Shreyas Iyer nung jenjang asadanga shimtsü.

Iyer, shiba tapubang surgery agir lir, iba tour atongtsü lia pa taneptsü ngura, pai külem team pur den asayatsü.

India tetsür team pur mezüing 'Day-Night Test' asayatsü: BCCI Secretary Shah

New Delhi, Monupii/May 20, 2021 (Agencies): Taküm küm Australia Tour mapang, India tetsür cricket team pur mezüing 'day-night Test' asayamung nung tokteptsü terenemba lir, ta Brehostibarnü BCCI secretary Jay Shah-i ashi.

Shah-i Twitter sabang ajanga, tetsür asaya (cricket) ajungkettsütsü asoshi BCCI indang mapatong shilem ama iba mera agir ta ashiba mapang pai iba osang sangoktsü.

"Tetsür Cricket asaya tsütsü maparen maneni tejakleni bener aotsü nangzüktepba shilem ama, taküm Australia nung Team India @BCCI tetsür temi mezüing 'pink ball day-night Test' asayatsü aser iba maongka anguba osang pelashishia sangdonger," ta Twitter ajanga Shah-i metetdaktüsü.

India tetsür team, shirnoki

küm tenet nung mezüing Test (June 16, 2021 nungi tenzüksü) asayatsü renemdar, iba Tour mapang parnoki Australia nung ano Test ka asayatsü sentong lir.

Kasa mapang India tetsür team-i ODI aser T20 International match tem asayatsü.

Item asaya (Australia) atema anogo/mapang ano magütsü, saka taküm September tom ka nungi iba asaya tenzüksü akok. 2006 küm India tetsür team-i tesüsa Australia tetsür team den Test asayaogo.

Tetsür Cricket putiotsü nung India aser Australia tsüingda pink ball Test asayamung ya tanabuba alitsü.

2017 küm November ita Sydney nung Australia aser England tsüingda mezüing day-night Test asayadanga lir. Iba asaya draw nung tembang.

Olympic 400m takok angusang Lee Evans süogo



sendakba nung Evans-i lemsatep.

Evans, shiba 1947 küm Madera, California nung February 24 nü aso, Overfelt High School nung asaya tsütsü takok tajung anguba sülen, San Jose State University indang nüngtugu sprinting programme nung shilem agia national jenjang tongtet.

National 400m title pungo rongnung 1966 küm pai mezüing title takok angu.

1967 küm Pan American Games asayamung 400m tetoktepba nunga Evans-i takok angu aser 1972 Olympic trials mapang iba asayamung atema 4x400m relay team nung berth ka angutsü mechi 400 meters nung par teloki jenjang pezübuba nung takok angu.

1973 küm Evans asayar takotet ka aküm aser International Track Association indang shilem ama race asaya nung shilem agi, saka 1980 küm IAAF (World Athletics) ajanga pa tanaben 'amateur' (ano takotet asayar ka maküm) ama jenjang melenshitsü.

Iba sülen küm aika atema Evans-i track aser field program balala nung coach aser director inyakogo.

1975 aser 1997 tsüingda Evans-i Nigeria aser Saudi Arabia indang national track aser field program tem atema director inyak; aser tanga linük 18 nung athlete tem training agütsü.

2002 küm, Evans-i University of Washington indang coaching staff nung aden aser iba sülen alima tesem balala nung coaching agüja aser advisor ka ama inyaka liasü.

Los Angeles, Monupii/May 20, 2021 (Agencies): 1968 Olympic 400m champion aser Human Rights atema Olympic Project ngutetsang Lee Evans arishi küm 74 nung süogo, ta USA Track & Field sangdong ka ajanga metetdaktüsü.

USATF ajanga Lee asüba kuli agüja mali saka 'San Jose Mercury News' sangdong ka ajanga angazükba agi, taoba hopta Nigeria nung Lee Evans stroke (tekolok agi mapa meinyaki akümba) asü aser mozüki nung munga aru. Mexico Games 400m tetoktepba nung Evans-i second 43.86 agia alizüing tongteta asem. Pai iba race takok anguba den külemi iba asayamung (400m) nung second 44 agia alizüing tongteta asemer rongnung pa mezüing aküm.

"Ni kanga anibelega liasü. Taoba mapang meinyaktetba ka ni inyaktetogo ta ni meteta aru," ta Evans-i NBC Sports dang ashi.

Mexico Games nung atalokbatem amshia yangluba documetary - "1968" nung pai ashiba olen amshigo.

"Ni iba asaya takok angu ta mejangjai liasü. Shingaia kü dang ni iba race kokogo ta mashi, saka parnoki oren tanga amshia iba asaya akokba kü dang ashi," ta asaya dak

BILEMDANGANG

"Pei sasa kümdangshir ang tangar danga tekümdangtsü shiang."